

БОСНА И ХЕРЦЕГОВИНА
Центар за информисање и
признавање докумената из
области високог образовања



BOSNA I HERCEGOVINA
Centar za informiranje i priznavanje
dokumenata iz područja/oblasti
visokog obrazovanja

Centre for Information and Recognition of Qualifications in Higher Education

IZVJEŠTAJ
O RADU CENTRA ZA INFORMISANJE I PRIZNAVANJE DOKUMENATA IZ
OBLASTI VISOKOG OBRAZOVANJA ZA 2011. GODINU
(Bosanski jezik)

Mostar, januar 2012. godine

88000 Mostar, Ulica Kneza Branimira 12
telefon +387 36 333 980
www.cip.gov.ba



88000 Mostar, Ulica Kneza Branimira 12
faks +387 36 333 991
www.cip.gov.ba

Obaveza izrade i dostavljanja Izvještaja o radu propisana je Zakonom o ministarstvima i drugim organima uprave, a predviđena je Programom rada Vijeća ministara Bosne i Hercegovine za 2012. godinu.

Izvještaj o radu Centra za informisanje i priznavanje dokumenata iz oblasti visokog obrazovanja sadrži opis najznačajnijih aktivnosti koje su izvršene u 2011. godini, ocjenu stanja u oblasti informisanja i priznavanja dokumenata u BiH i ostvarene rezultate u 2011. godini u okviru nadležnosti Centra za informisanje i priznavanje dokumenata iz oblasti visokog obrazovanja.

Izvještaj je sačinjen na osnovu planiranih poslova i zadataka koji su utvrđeni Programom rada Centra za informisanje i priznavanje dokumenata iz oblasti visokog obrazovanja za 2011. godinu, kao i u skladu izvršenim poslovima koji su realizirani na osnovu zahtjeva nadležnih institucija Bosne i Hercegovine, kao i međunarodnih organizacija koje se bave pitanjima visokog obrazovanja.

Izvršeni poslovi i zadaci, na osnovu kojih je rađen ovaj Izvještaj, evidentirani su, tokom godine, kroz informacije, izvještaje, programe, druge materijale i pojedinačne akte.

Izvještaj o radu Centra za informisanje i priznavanje dokumenata iz oblasti visokog obrazovanja za 2011. godinu dostavlja se Upravnom odboru Centra za informisanje i priznavanje dokumenata iz oblasti visokog obrazovanja na razmatranje, a Vijeću ministara Bosne i Hercegovine na razmatranje i usvajanje.

SADRŽAJ

	strana
1. Uvod	4
2. Realizacija najznačajnijih aktivnosti	4
3. Stanje u oblasti informisanja i priznavanja u BiH	5
4. Izvršenje zakona	5
5. Evropske integracije	6
5. 1. Projekti na reformi visokog obrazovanja	
6. Planirani i izvršeni programski zadaci	7
Organizacija Konferencije	7
Učešće na međunarodnim konferencijama i drugim aktivnostima	7
Web stranica	11
Kadrovske aktivnosti	11
Izrada podzakonskih akta	12
Planiranje budžeta	13
Revizija institucija BiH	15
Javne nabavke	16
Obuka državnih službenika	16
Kancelarijsko i arhivsko poslovanje	17
Saradnja sa nadležnim institucijama	17
Zaključak	18

I UVOD

Centar za informisanje i priznavanje dokumenata iz oblasti visokog obrazovanja (u daljem tekstu: Centar) osnovan je u skladu sa Okvirnim zakonom o visokom obrazovanju u Bosni i Hercegovini ("Službeni glasnik BiH", broj 59/07 i 59/09) kao samostalna upravna organizacija.

U skladu sa Odlukom Vijeća ministara Bosne i Hercegovine o početku rada i utvrđivanju sjedišta Centra za informisanje i priznavanje dokumenata iz oblasti visokog obrazovanja, broj 4/08 od 10. januara 2008. godine, sjedište Centra je u Mostaru.

Nadležnost Centra propisana je članom 45. Okvirnog zakona o visokom obrazovanju u Bosni i Hercegovini ("Službeni glasnik BiH", broj 59/07 i 59/09 - u daljem tekstu: Okvirni zakon), dok je odredbom člana 46. stav 3. i 4. istog zakona propisano da Centrom rukovodi direktor, a upravlja Upravni odbor. Upravni odbor Centra ima sedam članova. Članove Upravnog odbora bira Vijeće ministara Bosne i Hercegovine u skladu sa procedurom koja je propisana zakonom.

II REALIZACIJA NAJZNAČAJNIJIH AKTIVNOSTI

Sve aktivnosti koje je Centar preduzimao u izvještajnom periodu bile su prvenstveno usmjerene na dosljednu i blagovremenu realizaciju zadataka utvrđenih u Programu rada za 2011. godinu i u skladu sa nadležnostima utvrđenim u Okvirnom zakonu, Konvenciji o priznavanju kvalifikacija koje se odnose na visoko obrazovanje u evropskoj regiji (Lisabonska konvencija) i njenim pratećim dokumentima i drugim važećim propisima.

U skladu sa programskim zadacima, najznačajnije aktivnosti Centra u izvještajnom periodu bile su usmjerene na izvršavanje sljedećih poslova i zadataka:

- Dostavljanje obavještenja, mišljenja i preporuka nadležnim ministarstvima obrazovanja i drugim stranama sa zakonitim interesom o načinu priznavanja visokoškolskih kvalifikacija koje su stečene izvan Bosne i Hercegovine nakon 6. aprila 1992. godine;
- Praćenje primjene Preporuka o kriterijumima za vrednovanje inostranih visokoškolskih kvalifikacija u postupku priznavanja u svrhu zapošljavanja i nastavka obrazovanja ("Sl. glasnik BiH", broj 88/10);
- Učešću u projektima iz oblasti visokog obrazovanja u saradnji sa Evropskom unijom, Savjetom Evrope, Delegacijom Evropske komisije, UNESCO i drugim evropskim i međunarodnim organizacijama;
- Učešće na regionalnim i međunarodnim konferencijama o priznavanju visokoškolskih kvalifikacija;
- Uređivanje i dalja dogradnja web stranice Centra;
- Saradnji sa mrežom ENIC/NARIC centara u Evropi i svijetu;
- Izrada i dostavljanje informacija i izvještaja i drugih materijala nadležnim institucijama Bosne i Hercegovine;
- Pripremanje materijala za rad i sjednice Upravnog odbora Centra;
- Pripremanje i dostavljanje Zahtjeva za dodjelu finansijskih sredstava iz Budžeta za 2012. godinu;
- Izrada opštih pravnih akta u skladu sa propisima;
- Javne nabavke;
- Kadrovske aktivnosti;
- Organizovanje kancelarijskog i arhivskog poslovanja;

- Saradnja sa nadležnim ministarstvima obrazovanja, univerzitetima i drugim nadležnim institucijama u Bosni i Hercegovini.

III STANJE U OBLASTI INFORMISANJA I PRIZNAVANJA VISOKOŠKOLSKIH KVALIFIKACIJA U BOSNI I HERCEGOVINI

U skladu sa ustavnim nadležnostima, Republika Srpska, većina kantona u Federaciji BiH i Brčko distrikt BiH donijeli su svoje zakone i podzakonske propise i, u najvećem broju slučajeva, na odgovarajući način uredili pitanja priznavanja visokoškolskih kvalifikacija. Međutim, još uvijek, nije u potpunosti izvršeno usaglašavanje pravnih propisa u oblasti priznavanja visokoškolskih kvalifikacija, prije svega, sa Lisabonskom konvencijom koja je, ratifikacijom od strane Predsjedništva Bosne i Hercegovine ("Službeni glasnik BiH", broj 16/03-Međunarodni ugovori), postala sastavni dio pravnog sistema Bosne i Hercegovine i njena primjena ima obavezujući karakter na cijeloj teritoriji Bosne i Hercegovine. Informacije sa kojima Centar raspolaže ukazuju da je stanje usklađenosti propisa koji uređuju oblast priznavanja visokoškolskih kvalifikacija sa Okvirnim zakonom i Lisabonskom konvencijom na znatno većem nivou u odnosu na predhodne godine, iako još uvijek ima kantona u Federaciji BiH koji nisu donijeli svoje zakone o visokom obrazovanju.

I pored prisutnih problema, stanje u oblasti priznavanja visokoškolskih kvalifikacija na teritoriji Bosne i Hercegovine je na zadovoljavajućem nivou. Pozitivnom stanju u ovoj oblasti, u skladu sa zakonom utvrđenim nadležnostima, svakako je doprinio i Centar svojim ukupnim angažovanjem, koordinacijom aktivnosti i neposrednom saradnjom sa nadležnim institucijama koje se bave pitanjima priznavanja. Naravno da postoje potreba da se stanje u ovoj oblasti unaprijedi i poboljša, čemu će i Centar, u okviru svojih nadležnosti, davati svoj doprinos. Ono što smatramo vrlo važnom u provođenju ovih aktivnosti jeste činjenica da Centar nema saznanja da je bilo slučajeva da je nekom građaninu BiH, stranom državljaninu i izbjeglom licu uskraćeno pravo na priznavanje visokoškolske diplome ukoliko je zahtjev podnesen u skladu sa propisima, niti da je bilo diskriminacije građana po bilo kom osnovu.

IV IZVRŠENJE ZAKONA

Na zahtjev Ministarstva civilnih poslova BiH, Centar je pripremio informaciju o izvršenju Okvirnog zakona o visokom obrazovanju u Bosni i Hercegovini i o realizaciji drugih aktivnosti koje se odnose na provođenje Lisabonske konvencije iz nadležnosti Centra.

V EVROPSKE INTEGRACIJE

• Projekti na reformi visokog obrazovanja

Centar je u izvještajnom periodu nastavio s kontinuiranom saradnjom s Delegacijom Evropske komisije, Savjetom Evrope i drugim evropskim organima i tijelima koja rade na realizaciji projekata iz oblasti reforme obrazovanja u Bosni i Hercegovini.

U izvještajnom periodu Centar je bio uključen u tri takva projekta:

1) "Jačanje visokog obrazovanja u BiH III", zajednički projekt Evropske komisije i Vijeća Evrope. Projekt ima za cilj donošenje preporuka za usvajanje nove pravne regulative o osiguranju kvaliteta u visokom obrazovanju u BiH; započinje aktivnosti eksterne evaluacije BiH univerziteta; primjenu državnog kvalifikacijskog okvira na nekoliko konkretnih studijskih programa; te jačanje mreže BiH eksperata za obezbjeđenje kvaliteta.

U okviru ovog Projekta provedena je pilot aktivnost, čiji je cilj izraditi konstruktivni pristup integrisanja novih Bolonjskih stepena i postojećih smjernica u BiH, te pružiti smjernice za dalju primjenu okvira. Ukupno 45 predmetnih stručnjaka sa 10 javnih i privatnih univerziteta

su učestvovali u ovoj aktivnosti, primjenili okvir na tri polja studija (ekonomija, mašinstvo i engleski jezik), i izradili modularni osnovni nastavni plan i program za ove kvalifikacije. Među instrumentima izrađenim u sklopu aktivnosti je „Vodič dobre prakse u izradi nastavnih planova i programa“, kao i niz obrazaca za izradu nastavnih planova i programa i validnost programa.

2) "EU podrška reformi visokog obrazovanja u BiH", projekt iz IPA 2007. godine - projekt je službeno počeo 21.10.2009. godine, a završio 20.10.2011. godine. U okviru Komponente 1. Projekta izrađena su dva dokumenta: Analiza stanja zakonodavstva i prakse na području priznavanja inozemnih visokoškolskih kvalifikacija u BiH i Smjernice za priznavanje inozemnih visokoškolskih kvalifikacija u BiH.

Također u okviru Projekta Centar je, zajedno sa inostranim ekspertom učestvovao u radnim posjetama svim javnim univerzitetima u BiH. Tokom ovih posjeta ukazano je na nedostatke i nedosljednosti u postupku priznavanju inostranih kvalifikacija, sa posebnim osvrtom na nedostatke vezane za dosljednu primjenu Lisabonske konvencije. U saradnji s projektnim timom izradili smo Priručnik Centra i promotivni letak, koji su na jednom mjestu objedinili pravne propise i analizu stanja u oblasti priznavanja inostranih visokoškolskih kvalifikacija.

3) Nastavljena je saradnja sa UNESCO vezano za učešće Centar-a u radu UNESCO portala za visoko obrazovanje. Web stranica portala je u ovoj godini doživjela vizuelne izmjene, tako da je pretraživanje stranice umnogome olakšano. U ovoj godini radu portala priključilo se 6 država, tako da se ukupan broj država koji učestvuju u njegovom radu povećao na 41 državu. Centar je nastavio sa administriranjem nad dijelom web stranice koji se odnosi na visokoobrazovni sistem Bosne i Hercegovine.

4) "Izgradnja visokokvalitetnog srednjeg strukovnog obrazovanja (VET IV) u BiH" – projekt finansiran iz IPA sredstava za 2008. godinu. Dvogodišnji projekt EU VET IV započeo je s primjenom u januaru 2011. godine. Ciljevi projekta se realizuju kroz tri komponente: Komponenta 1 ima za cilj izradu kvalifikacijskog okvira za nivo srednjeg i tercijarnog van-univerzitetskog obrazovanja, odnosno izradu generičkih deskriptora: izrada standarda zanimanja i trening standardi za najmanje tri odabrana zanimanja (odabrana porodica zanimanja je poljoprivreda i prerada hrane); Nastavni plan i program za izabrana zanimanja harmonizovani su sa trening standardima i pilotirani u najmanje 60% svih škola koje obrazuju izabrana zanimanja. U okviru ove komponente formirane su dvije radne grupe: grupa za izradu kvalifikacijskog okvira (predstavnik Centra) i grupa za izradu standarda zanimanja. Cilj Komponente 2 je podrška Odjeljenju za srednje strukovno obrazovanje i obuku Agencije za predškolsko, osnovno i srednje obrazovanje u svrhu postizanja pune operativnosti u području izrade trening standarda, izrade nastavnih planova i programa, monitoringa i evaluacije nastavnih planova i programa. Komponenta 3 ima za cilj evaluaciju modularnih, tradicionalnih i zajedničkih jezgri nastavnih planova i programa; izradu prijedloga nove školske i pedagoške dokumentacije za srednje strukovne škole; izradu mape puta i akcionog plana za provođenje reforme srednjeg strukovnog obrazovanja u BiH.

U septembru 2011. godine počela je primjena **EU projekta "Jačanje ljudskih kapaciteta u Bosni i Hercegovini"**. Projekt koji je finansiran iz EU fonda IPA 2009. i biće primijenjen u vremenu od septembra 2011. do septembra 2013. godine. Osnovni cilj projekta je da se ojačaju ljudski resursi i poveća djelotvornost tržišta rada kroz institucionalni i strateški razvoj cjeloživotnog učenja. Projekt će biti implementiran u partnerstvu s nadležnim vlastima i institucijama na svim nivoima sektora za obrazovanje, rada i zapošljavanja i statistike, kroz tri komponente: Obrazovanje odraslih u kontekstu cjeloživotnog učenja; Obrazovna statistika; Grant sheme – Jačanje kapaciteta potencijalnih grant aplikanata.

VI PLANIRANI I IZVRŠENI PROGRAMSKI ZADACI

• Organizacija konferencije

U organizaciji Centra u Mostaru je 29. i 30. septembra 2011. godine održana Prva regionalna konferencija ENIC centara. Konferenciji su prisustvovali predstavnici ENIC centara Hrvatske, Slovenije i Crne Gore, predstavnik Ministarstva civilnih poslova Bosne i Hercegovine, Delegacije Evropske unije u Bosni i Hercegovini, GOPA Counslants kompanije, Ministarstva prosvjete i kulture Republike Srpske, Ministarstva obrazovanja i nauke Federacije BiH, Odjeljenja za obrazovanje Vlade Brčko distrikta BiH, predstavnici županijskih/kantonalnih ministarstava obrazovanja, predstavnici javnih univerziteta u Bosni i Hercegovini, kao i članovi Upravnog odbora Centra.

Učesnici Konferencije upoznali su se s postupcima priznavanja i sa aktualnom situacijom u procesu priznavanja inostranih visokoškolskih kvalifikacija u regionu i Bosni i Hercegovini, kao i sa problemima u primjeni Konvencije o priznavanju kvalifikacija u visokom obrazovanju u evropskoj regiji (Lisabonska konvencija). Tokom Konferencije prisutni su razmjenili iskustva i ukazali na primjere dobre prakse iz rada regionalnih ENIC centara. Dogovorene su dalje aktivnosti na jačanju međusobne saradnje i pružanja pomoći u procesu priznavanja.

Na ovom skupu su sagledana i predložena rješenja za efikasniji postupak priznavanja visokoškolskih kvalifikacija, kako u svrhu nastavka obrazovanja tako i u svrhu pristupu tržištu rada. Na kraju konferencije doneseni su odgovarajući zljključci koji su dostavljeni svim učesnicima i nadležnim institucijama.

• Učešće na međunarodnim konferencijama i drugim aktivnosti

- 1) Od 17. do 24. 09. 2011. godine, predstavnik Centra je boravio u studijskoj posjeti u Strasburu (Republika Francuska). Ova posjeta je dio druge komponente EU projekta "Podrška reformi visokog obrazovanja u BiH". Osim predstavnika Centra, delegaciju BiH su činili i službenici ministarstava obrazovanja i javnih univerziteta. Cilj posjete je bio posjeta relevantnim obrazovnim ustanovama, tokom koje su se članovi Radne grupe 2 upoznali s radom Univerziteta u Strasburu, ministarstava za obrazovanje, kao i napretkom u oblasti visokog obrazovanja u Republici Francuskoj. Takođe, tokom posjete učesnici su se upoznali s procesom integracije univerziteta i razmjenili iskustva o pitanjima koja su vezana za izradu i provođenje plana integracije u evropskom prostoru visokog obrazovanja.
- 2) Učešće na dvije dvodnevne radionice Radne grupe 1- Projekta "EU podrška reformi visokog obrazovanja u BiH", na kojima je izrađena Analiza stanja zakonodavstva i prakse u oblasti priznavanja inostranih visokoškolskih kvalifikacija/isprava u BiH i Smjernice za priznavanje inozemnih visokoškolskih kvalifikacija u BiH. Učešće na dvodnevnom seminaru i informativnoj obuci iz oblasti priznavanju inostranih visokoškolskih kvalifikacija, te sa inostranim ekspertom učestvovali u radnim posjetama svim javnim univerzitetima u Bosni i Hercegovini.
- 3) Učešće na jednoj jednodnevnoj radionici Radne grupe za izradu Osnova kvalifikacijskog okvira u BiH, na kojoj je dokument finaliziran i usuglašen.
- 4) Učešće na trodnevnom, redovnom godišnjem 18. sastanku ENIC-NARIC mreže. Sastanak se održao u Varšavi, u Republici Poljskoj. Na sastanku je bilo govora o reformi obrazovanja u smislu kreiranja vladinih nastavnih programa, mobilnosti studenata, formiranja odbora koji će raditi posnmatranje vezano za mobilnost studenata, sinergiji između kvalifikacijskih okvira i priznavanja u svrhu daljeg učenja, Na sastanku su predstavljene aktivnosti UNESCO i aktuelni NARIC projekti, projekat priznavanja u Evropskom području visokog obrazovanja odnosno EAR projekat, aktivnosti ELCORE grupe, te visokoobrazovni sistem Kine.

- 5) Učešće na jednodnevnom sastanku zemalja Jugoistočne Evrope vezano za nacionalne kvalifikacijske okvire u tim zemljama, odnosno njihovo usklađivanje u Varšavi.
- 6) Učešće na jednodnevnoj radionici, Univerzitet u Sarajevu, promocija projekta mobilnosti: Join EU-SEE, Basileus i EM2-STEM.
- 7) Učešće na okruglom stolu "Pregled trenutne organizacije upravljanja univerzitetima u BiH" u organizaciji EU projekta "Podrška reformi visokog obrazovanja u BiH" i Rektorske konferencije u BiH.
- 8) Učešće na jednodnevnoj radionici za planiranje i kandidiranje investicionih projekata za Program javnih investicija.
- 9) Učešće na jednodnevnom seminaru u organizaciji Direkcije za evropske integracije "Evropski socijalni fond (ESF) – iskustva Španije".
- 10) Učešće na Konferenciji "Austrijska podrška visokom obrazovanju u BiH"/"Uslovi i standardi za razvoj i implementaciju doktorskih programa u BiH" u organizaciji World University Service (WUS) Austrija.
- 11) Predstavnik Centara prisustvovao je 5. sastanku Odbora Konvencije o priznavanju kvalifikacija visokoškolskog obrazovanja u evropskoj regiji, u Parizu. Tema sastanka bila je pregled "Preporuka o kriterijima i procedurama za ocjenu stranih kvalifikacija i perioda studija", prilikom koje su usvojene izmjene koje se tiču korištenja preporuka za sve nivoe obrazovanja.
- 12) Učešće u radu dvodnevne Konferencije zainteresovanih strana o priznavanju u evropskoj visokoobrazovnoj oblasti, koja je održana u Rigi (Letonija). Cilj Konferencije u Rigi je bio prikupiti mišljenja svih zainteresovanih strana vezano za najvažnije aspekte koji imaju uticaj na prakse u priznavanje, kao i o nacionalnoj legislativi.
- 13) Učešće na četverodnevnoj radionici za razvoj kvalifikacijskog okvira u BiH u okviru EU VET IV projekta „Izgradnja visokokvalitetnog srednjeg strukovnog obrazovanja (VET IV) u BiH“. Opšti cilj Radionice je bio potpora nastavku rada na generičkim deskriptorima za Kvalifikacijski okvir u BiH (KO u BiH) za nivoe od 1 do 5. Pod tim se podrazumijeva priprema primjene generičkih deskriptora u daljnjem razvoju Kvalifikacijskog okvira u BiH. Specifično, to se odnosi na: izradu standarda zanimanja, izradu nastavnih planova i programa, izradu ishoda znanja, odnosno kasnije uređenje ispita i drugih načina provjere stečenih kompetencija, te uređenje sistema obezbjeđenja kvaliteta.
- 14) Učešće na jednodnevnim konsultacijama o razvoju Kvalifikacijskog okvira u BiH u organizaciji Evropske trening fondacije i Ministarstva civilnih poslova BiH.
- 15) Predstavnici Centra su 20. oktobra 2011. godine prisustvovali Završnoj konferenciji projekta kojeg je finansirala Evropska unija "Podrška reformi visokog obrazovanja u Bosni i Hercegovini". Konferencija je označila završetak dvogodišnjeg Projekta, čije implementiranje je počelo u oktobru 2009. godine, a koji je realizovano u okviru dvije komponente: Priznavanje inostranih visokoškolskih kvalifikacija i Upravljanje i menadžment univerziteta. U okviru Komponente 1 ovog Projekta izrađene su smjernice za priznavanje inostranih visokoškolskih kvalifikacija u Bosni i Hercegovini, te je provedena informativna obuka i podizanje svijesti o priznavanju među svim relevantnim ustanovama i institucijama koje se bave pitanjem priznavanja. Aktivnosti u okviru Komponente 2 bile su usmjerene na pružanje podrške institucionalnom razvoju sveučilišta u BiH radi povećanja isplativosti poslovanja njihove administracije i menadžmenta, a putem uvođenja modela integriranog sveučilišta. Provedena je obuka na svim javnim sveučilištima u BiH o temi ključnih pitanja iz oblasti upravljanja i menadžmenta sveučilišta, te su izrađene preporuke za unapređenje procesa integracije visokoškolskih ustanova u BiH. Cilj Konferencije je bio informiranje bosansko-hercegovačke javnosti o implementiranim aktivnostima i predstavljanje rezultata Projekta. Konferenciji su, osim

predstavnik Centra prisustvovali svi korisnici Projekta i to: rektori i drugi predstavnici menadžmenta sveučilišta, predstavnici svih ministarstava obrazovanja u BiH, predstavnici Agencije za razvoj visokog obrazovanja i osiguranje kvalitete, kao i predstavnici drugih domaćih i međunarodnih tijela i organa koji djeluju u području visokog obrazovanja u BiH. Evropska unija je putem Instrumenta pretpristupne pomoći (IPA) obezbijedila je 1,1 milion evra za ovaj projekat, koji je implementirao međunarodni konzorcij predvođen njemačkom kompanijom GOPA Consultants.

- 16) Direktor i pomoćnik direktora održali su radni sastanak s predstavnicima projektnog tima EU projekta „Jačanje ljudskih kapaciteta u Bosni i Hercegovini“. Predstavnici Projektnog tima su iskazali zadovoljstvo i zahvalili na odvojenom vremenu, te ukratko prezentirali Projekt koji je financiran iz EU fonda IPA 2009 . Projekt će biti implementiran u vremenu od septembra 2011. do septembra 2013. godine. I ima za cilj da ojača ljudske resurse i poveća djelotvornost tržišta rada kroz institucionalni i strateški razvoj cjeloživotnog učenja. Projekt će biti implementiran u partnerstvu s nadležnim vlastima i institucijama na svim razinama sektora za obrazovanje, rada i zapošljavanja i statistike.
- 17) Direktor i pomoćnici direktora Centra, u maju i julu ove godine posjetili su ENIC/NARIC centre Republike Srbije i Republike Hrvatske. Navedeni sastanci su bili prilika da se razmijene iskustva i ukaže na probleme na koje se nailazi u proceduri priznavanja inostranih visokoškolskih kvalifikacija. Ove posjete su imale za cilj postizanje dogovora o olakšavanju i pojednostavljivanju pristupu potrebnim informacijama o provjeri vjerodostojnosti diploma, studijskim programima i visokoškolskim ustanovama.
- 18) U okviru EU projekta "Podrška reformi visokog obrazovanja u BiH", a u organizaciji Rektorske konferencije BiH, predstavnik Centra učestvovao je u radu dvodnevne Regionalne konferencije "Upravljanje univerzitetima u zemljama Zapadnog Balkana" s posebnim osvrtom na temu "Uspjesi i izazovi u procesu integracije univerziteta" koja je održana u Sarajevu.
- 19) U okviru EU projekta „Podrška reformi visokog obrazovanja u BiH“, predstavnici Centra učestvovali su na dvodnevnom seminaru i obuci o priznavanju inostranih visokoškolskih kvalifikacija, koji je održan u Trebinju, na kome je prezentirana uloga, zadaci i aktivnosti Centra.

Centar je nastavio da predstavlja Bosnu i Hercegovinu u ENIC/NARIC mreži nacionalnih informacionih centara za akademska priznavanja i mobilnost. Centar je administrator nad dijelom web stranice koja se odnosi na podatke vezane za visokoškolski obrazovni sistem u Bosni i Hercegovini.

Centar je uključen u rad ENIC liste (ENIC listserv) preko koje svakodnevno sa drugim informacionim centrima razmjenjuje iskustva i informacije vezane za pojedinačne probleme neke od članica ENIC/NARIC mreže. Zbog stručnog i profesionalnog napretka uputili smo pismo namjere UNESCO za administriranje nad listserv-om ENIC/NARIC mreže za vremenski period 2013.-2016. godine, te izmjene ili izradu nove web stranice ENIC/NARIC mreže.

U izvještajnom periodu Ministarstvo prosvjete, nauke, kulture i sporta Posavskog kantona zatražilo je 56 mišljenja u svrhu nostrifikacije i ekvivalencije inostranih visokoškolskih isprava, jer bez predhodno pribavljenog mišljenja Centra nije moguće okončati pomenuti postupak. Obratili smo se matičnim fakultetima i univerzitetima, te ENIC/NARIC centrima država u kojima su predmetne diplome izdate i na osnovu dobijenih informacija dostavili mišljenja Ministarstvu prosvjete, nauke, kulture i sporta Posavskog kantona.

Na zahtjev Ministarstva prosvjete, nauke, kulture i sporta Posavskog kantona dostavljeno 50 vrednovanja inostranih visokoškolskih kvalifikacija sa detaljno prikupljenim informacijama u vezi akreditacije visokoškolske ustanove koja je izdala obrazovnu ispravu, programu studija, trajanju studijskog programa, kao i pravima nosioca stečene kvalifikacije u pogledu

zaposlenja i nastavka obrazovanja u zemlji u kojoj je inostrana visokoškolska kvalifikacija stečena.

Ministarstvu obrazovanja, nauke, kulture i sporta Tuzlanskog kantona dostavljeno je 40 vrednovanja inostranih visokoškolskih kvalifikacija u svrhu priznavanja inostranih visokoškolskih obrazovnih isprava.

Uprava za indirektno oporezivanje Bosne i Hercegovine, u svrhu revizije diploma svojih zaposlenih lica, dostavila je 5 zahtjeva za provjeru vjerodostojnosti diploma. Dostavljene diplome upućene su ENIC/NARIC centrima, ali i fakultetima i univerzitetima direktno. Dobijene informacije o vjerodostojnosti traženih diploma dostavljene su Upravi za indirektno oporezivanje Bosne i Hercegovine. U postupku provjere vjerodostojnosti diplome stečene na Višoj upravnoj školi u Zagrebu, utvrđeno je da se radi o diplomi koja nije vjerodostojna.

Od nacionalnih ENIC/NARIC centara Irske, Belgije, Crne Gore, Hrvatske, Holandije, Slovenije, Turske, Moldavije, Francuske, Austrije, Švedske, Australije, Makedonije, Njemačke, Indije, Malezije, SAD, Velike Britanije i Srbije, dobili smo upite o studijskim programima, akreditaciji fakulteta u Bosni i Hercegovini, kao i o vjerodostojnosti diploma. Sve tražene informacije dostavili smo u kratkom roku.

U izvještajnom periodu zaprimljeno je 127 e-mail zahtjeva zainteresovanih strana sa upitima o priznavanju stečenih kvalifikacija. Pored e-mail korespodencije zainteresovane strane Centru se obraćaju i telefonskim putem ili lično dolaze u prostorije Centra. Telefonskih upita i ličnih dolazaka bilo je ukupno 275 i na sve njih je odgovoreno u razumnom roku.

Takođe, tokom 2011. godine, na zahtjev građana i zainteresovanih institucija dostavljeno je 10 službenih dopisa o postupku priznavanja inostranih kvalifikacija; mišljenje o ekvivalenciji studijskih programa Federalnoj agenciji za državnu službu, a Univerzitetu u Zenici tumačenje po pitanju priznavanja perioda studija i nastavka studija; mišljenje Univerzitetu „Džemal Bijedić“ u Mostaru u vezi prava upisa na doktorske studije.

Na zahtjev Ministarstva civilnih poslova BiH popunjen je UNESKO upitnik: "Izvještaj o priznavanju studija i visokoškolskih kvalifikacija".

- **Web stranica - kreiranje i ažuriranje**

U ovoj godini Centar je nastavio sa unapređenjem sadržaja web stranice. Dodata su dva nova modula: "Lisabonska konvencija i njeni prateći dokumenti" i modul "Galerija fotografija". Vezano za modul Lisabonska konvencija i njeni prateći dokumenti, zajedno sa drugim zaposlenicim u Centru, prevedeni su najbitniji popratni dokumenti Konvencije o priznavanju kvalifikacija u visokom obrazovanju u Evropskoj regiji (Lisabonska konvencija) i postavljeni na web stranicu.

Za 12 mjeseci ove godine web stranicu Centra otvorilo je 162.260 posjetilaca.

Pregled posjećenosti pokazuje da je 81,37% posjetilaca iz Bosne i Hercegovine, 5,96% iz Srbije, 5,59% iz Hrvatske, 0,72 % iz Crne Gore, 0,68 % iz Austrije, 0,62 % iz Njemačke, 0,60 % iz Slovenije, 0,49 % iz SAD-a, 0,25% iz Švedske...

Centralni dio web stranice je i ove godine poslužio za informisanje javnosti o značajnim planiranim tekućim aktivnostima, aktuelnostima ili drugim zbivanjima vezanim za nadležnosti Centra.

Redovno se prati zakonska regulativa iz oblasti visokog obrazovanja i sve izmjene se ažuriraju i postavljaju na web stranicu. U toku ove godine to se prvenstveno odnosilo na izmjenu zakonske regulative u Republici Srpskoj, Tuzlanskom kantonu i Kantonu Sarajevo.

Budući da se broj upita povećava u sklopu EU projekta "Podrška reformi visokog obrazovanja u Bosni i Hercegovini" u ovoj godini angažovan je IT stručnjak koji je uradio novu, kvalitetniju bazu podataka. Ista je uspješno instalisana na server, otvara se putem bilo kojeg pretraživača i vrlo lako može da se modificira u SQL bazu.

- **Kadrovske aktivnosti**

Pravilnikom o unutrašnjoj organizaciji Centra predviđeno je da u Centra bude zaposleno ukupno 29 državnih službenika i zaposlenika (1 direktor, 3 rukovodeća državna službenika, 17 državnih službenika i 8 zaposlenika).

Na dan 31. decembar 2011. godine, u Centru je zaposleno 14 lica, i to: direktor, 3 (tri) rukovodeća državna službenika 6 (šest) državnih službenika i 4 (četiri) zaposlenika, što iznosi 48,27% u odnosu na planirani broj zaposlenih koji je predviđen Pravilnikom o unutrašnjoj organizaciji Centra. Do 1. jula 2011. godine u Centru je bio primljen jedan pripravnik i dva volontera sa VSS na godinu dana.

Kvalifikaciona struktura zaposlenih je sledeća: direktor ima završen treći ciklus studija (doktor nauka); 9 lica posjeduje visoko obrazovanje; 4 lica imaju SSS-IV stepen. Nacionalna struktura zaposlenih sa VSS je sledeća: 5 Srba (uključujući direktora); 3 Bošnjaka; 2 Hrvata, a sa SSS: 2 Srbina, 1 Bošnjak i 1 Hrvat.

Početkom 2011. okončan je postupak prijema dva zaposlenika u radni odnos na neodređeno vrijeme, po osnovu zapošljavanja odobrenog u 2010. godini.

Državni službenici i zaposlenici uredno su prijavljeni kod nadležnih službi penzijskog i zdravstvenog osiguranja. Sva lica u radnom odnosu uredno su upisana u Matičnu knjigu zaposlenih, a za sve zaposlene ustrojani su personalni dosijei sa propisanim dokumentima.

- **Izrada podzakonskih propisa**

U cilju zakonitog rada Centra, a u skladu sa Programom rada za 2011. godinu, u izvještajnom periodu izrađeni su i doneseni sljedeći podzakonski akti:

Redni broj	Naziv akta-propisa
1.	Odluka o izmjeni i dopuni Odluke o troškovima mobilne telefonije
2.	Odluka o limitu troškova reprezentacije i poklona (1.1-31.3.2011. godine)
3.	Plan ocjenjivanja državnih službenika
4.	Plan obuka državnih službenika
5.	Plan službenih putovanja
6.	Odluka o limitu troškova reprezentacije i poklona (1.4.-30.6.2011. godine)
7.	Plan korištenja godišnjih odmora
8.	Odluka o limitu troškova reprezentacije i poklona (1. 7.-30 .9. 2011. godine)
9.	Instrukcija o zaključivanju ugovora o djelu
10.	Pravilnik o javnim nabavkama
11.	Pravilnik o rashodovanju stalnih sredstava
12.	Odluka o limitu troškova reprezentacije i poklona (1. 10.-31 .12. 2011. godine)

13.	Lista kategorija registraturne građe s rokovima čuvanja
14.	Pravila za konsultacije pri izradi pravnih propisa
15.	Odluka o određivanju koordinatora za konsultacije

Programom rada Centra za 2011. godinu, predviđeno je donošenje Pravilnika o reprezentaciji i poklonima, te Pravilnika o načinu odobravanja službenih putovanja, pod uslovom da Savjet ministara Bosne i Hercegovine ova pitanja ne uredi svojim propisima. Kako je Savjet ministara Bosne i Hercegovine pokrenuo postupak donošenja ovih propisa i kako će predmetna materija biti regulisana na jedinstven način za sve institucije BiH, procedura donošenja ovih akata u Centra je obustavljena.

- **Planiranje budžeta**

U skladu sa Zakonom o finansiranju institucija BiH i instrukcijama Ministarstva finansija i trezora Bosne i Hercegovine (u daljem tekstu: MFT BiH), sačinjeni su:

Tabele pregleda prioriteta Centra (Dokument okvirnog budžeta) za period 2012. do 2014. godina.. Ukupna aktivnost Centra podijeljena u dva programa i to: Program 1. Informisanje i priznavanje dokumenata u oblasti visokog obrazovanja (koji predstavlja osnovnu djelatnost Centra) i Program 2. Strateško upravljanje i administracija (koji predstavlja administrativnu i logističku podršku u ostvarivanju osnovne djelatnosti CIP-a); Ovaj dokument dostavljen je MFT BiH u propisanom roku do 15.04. 2011. godine.

U ovom srednjoročnom okviru, sredstva za obavljanje djelatnosti Centra su planirana na sljedeći način: u 2012. godini 1.533.835 KM i sa ukupnim popunjavanjem 19 radnih mjesta; u 2013. godini 1.987.350 KM i sa ukupnim popunjavanjem 24 radna mjesta; u 2014. godini 2.170.210 KM sa planiranom punom zaposlenošću svih 29 predviđenih radnih mjesta.

Zahtjev za dodjelu sredstava iz budžeta za 2012. godinu dostavljen je MFT BiH u predviđenom roku.. Ovaj dokument sačinjen je na osnovu strateških i operativnih ciljeva u DOB-u 2012. – 2014. godine, utvrđene gornje granice rashoda za 2012. godinu i Nacrta programa rada Centra za 2012. godinu, analize planiranih troškova, te analiza prioritetenosti.

Cijeneći ograničenost ukupno raspoloživih javnih prihoda u svjetlu ekonomske krize, rukovodeći se principom maksimalne racionalizacije troškova, ukupan iznos traženih sredstava u Zahtjevu za dodjelu sredstava iz budžeta za 2012. godinu, je 1.034.183 KM, što je u odnosu na gornju granicu rashoda manje za iznos od 127.817 KM. Budžetski zahtjev Centra za 2012. godinu time je približno sveden na nivo budžetskog zahtjeva za 2011. godinu.

Od ukupno traženih sredstava, za **tekuće izdatke** je planirano 1.028.183 KM, pri čemu za:

Bruto plate i naknade (za 19 zaposlenih) u iznosu od:	520.906 KM;
• Naknade troškova uposlenih u iznosu od:	126.277 KM;
• Putni troškovi u iznosu od:	50.000 KM;
• Izdaci telefonskih i poštanskih usluga u iznosu od:	30.000 KM;
• Izdaci za energiju i komunalne usluge u iznosu od:	0 KM;
• Nabavka materijala u iznosu od:	25.000 KM;
• Izdaci za usluge prijevoza i goriva u iznosu od:	20.000 KM;
• Troškovi zakupa u iznosu od:	94.000 KM;
• Izdaci za tekuće održavanje u iznosu od:	20.000 KM;
• Izdaci za osiguranje i troškove platnog prometa:	4.000 KM;
• Ugovorene i druge posebne usluge u iznosu od:	138.000 KM;

Za **kapitalne izdatke** je planiran iznos od

6.000,00 KM.

Praćenje izvršenja budžeta i finansijsko izvještavanje

Obzirom da Zakon o budžetu institucija BiH i međunarodnih obaveza BiH za 2011. godinu nije usvojen, primjenjivane su Odluke o privremenom finansiranju iz budžeta institucija BiH, koje je donosio Savjet ministara BiH za sva četiri kvartala ove godine. U skladu sa donesenim Odlukama o privremenom finansiranju, sačinjena su i četiri prijedloga operativnih budžeta, koji je odobren od strane MFT BiH a ukupan iznos odobrenih sredstava iz budžeta za 2011. godinu iznosi 856.449 KM.

- 1) Prijedlog operativnog budžeta za januar, februar i mart 2011. godinu, a prema Odluci o privremenom finansiranju za period januar – mart 2011. godine, u iznosu od 261.744 KM;
- 2) Prijedlog operativnog budžeta za april, maj i juni 2011. godinu, a prema Odluci o privremenom finansiranju za period april – juni 2011. godine, u iznosu od 261.725 KM;
- 3) Prijedlog operativnog budžeta za juli, avgust, septembar i oktobar 2011. godinu prema Odluci o privremenom finansiranju za period juli – septembar 2011. godine, u iznosu od 199.535 KM;
- 4) Prijedlog operativnog budžeta za oktobar, novembar i decembar 2011. godinu, a prema Odluci o privremenom finansiranju za period oktobar – decembar 2011. godine, u iznosu od 133.445 KM;

U skladu sa Zakonom o finansiranju institucija BiH i Pravilnikom o finansijskom izvještavanju institucija BiH, sačinjeni su finansijski izvještaji u propisanim zakonskim rokovima. Od ukupno odobrenih sredstava budžeta za 2011. godine u iznosu od 856.449 KM, dinamika izvršenja budžeta po kvartalima je bila sljedeća:

- 1) Za period 01.01. - 31.03. 2011.godine u iznosu od 191.211 KM ili 73% od odobrenog budžeta po Odluci o privremenom finansiranju za period januar - mart 2011. godine;
- 2) Za period 01.01. – 30.06.2011.godine u iznosu od 397.552 KM ili 76% od odobrenog budžeta po odlukama o privremenom finansiranju za period januar - juni 2011. godine;
- 3) Za period 01.01. – 30.09.2011.godine u iznosu od 589.922 KM ili 82% od odobrenog budžeta po odlukama o privremenom finansiranju za period januar - septembar 2011. godine;
- 4) Za period 01.01. – 31.12.2011.godine u iznosu od ----- KM ili ---% od odobrenog budžeta po odlukama o privremenom finansiranju za period januar - decembar 2011. godine.

Obračun plata

U skladu sa Zakonom o finansiranju institucija BiH i Zakonom o platama i naknadama u institucijama BiH, obračun i isplatu plata za institucije BiH vrši MFT BiH putem sistema centralizovane isplate plata. Shodno tome, Centar je blagovremeno vršio pripremu ulaznih podataka za obračun plata i naknada te pravovremeno dostavljao Odsjeku za obračun plata u MFT BiH.

Uspostavljanje i održavanje sistema internog finansijskog upravljanja i kontrole

U svrhu unapređenja sistema interne kontrole, doneseni su, ili su sačinjene izmjene i dopune internih akata koje sačinjavaju sistem interne kontrole Centra, i to: Pravilnik o javnim

nabavkama; Pravilnik o rashodovanju stalnih sredstava; Odluke o limitu troškova reprezentacije i poklona, Instrukcija o sačinjavanju ugovora o djelu; Plan službenih putovanja; Odluka o izmjenama i dopunama odluke o troškovima mobilne telefonije.

Ostali poslovi iz oblasti finansija

Pored navedenih poslova, Centar je u skladu sa pozitivnim propisima obavljao knjigovodstveno-finansijske i blagajničke poslove i izvršio redovan godišnji popis imovine i obaveza Centra.

- **Revizija institucija Bosne i Hercegovine**

a) Finansijska revizija

Kancelarija za reviziju institucija BiH je u aprilu mjesecu izvršila konačnu reviziju finansijskih izvještaja Centra za 2010. godinu. Nakon izvršene revizije, Kancelarija za reviziju je 23.05.2011. godine dostavila i konačan izvještaj o izvršenoj reviziji za 2010. godinu, u kojem, bez izražavanja rezervi ili skretanja pažnje, izražavaju mišljenje da finansijski izvještaji Centra prikazuju fer i istinito, po svim bitnim pitanjima, stanje imovine i obaveza na dan 31. 12. 2010. godine i rezultate poslovanja i izvršenje budžeta za godinu koja se završava na taj dan i u skladu sa prihvaćenim okvirom finansijskog izvještavanja. U izvještaju su date i preporuke koje se tiču unapređenja procesa planiranja budžeta, te da se u cilju jačanja sistema interne kontrole, izvrši dorada internih pravila kojima je regulisano zaključivanje ugovora o djelu. Preporuke Kancelarije za reviziju u potpunosti su ispoštovane.

b) Revizija učinka

Kancelarija za reviziju institucija BiH je izvršila reviziju učinka na temu „Upravljanje troškovima zakupa za rad i smještaj institucija BiH“. Centar je kao institucija BiH, koja svoj rad organizuje u zakupljenim prostorijama, bio jedna od institucija gdje je vršena kontrola.. Kancelarija za reviziju donijela je preporuke sa ciljem da se sredstva za ovu namjenu koriste ekonomičnije i transparentnije. Preporuke institucijama koje koriste zakupljene prostorije za rad i smještaj su da: preispitaju svoje ugovore o zakupu i razmotre mogućnosti smanjenja zakupljene površine, ugovorene cijene i preseljenje iz centra u druge gradske zone; provode transparentne procedure pribavljanja zakupa; analiziraju ponudu na tržištu i u tom smislu maksimalno iskoriste povoljne tržišne okolnosti i poziciju države kao poželjnog zakupodavca. Centar je, neovisno o izvršenoj reviziji i prije dostavljanja izvještaja o reviziji učinka, u avgustu mjesecu 2011. godine pristupio detaljnoj analizi ponude na tržištu iznajmljivanja kancelarijskih prostora, a sve u cilju zaključivanja što povoljnijeg ugovora o zakupu poslovnog prostora za narednu godinu. U tom smislu, prikupljeno je pet ponuda i izvršena njihova detaljna analiza, u pogledu cijene, lokacije, rasporeda prostorija, dodatnih usluga koje pružaju pojedini ponuđači i ukupne površine koju nude. Na osnovu utvrđenih kriterija, za 2012. godinu izabrana je ekonomski najpovoljnija ponuda, uz postignutu nižu cijenu zakupa u odnosu na 2011. godinu. Na ovaj način, Centar je u potpunosti ispoštovao preporuke Kancelarije za reviziju, tako što je preispitan postojeći ugovor o zakupu, proveden transparentan postupak prikupljanjem više ponuda i njihovim ocjenjivanjem prema utvrđenim kriterijima, što je na kraju rezultiralo nižom cijenom zakupa i uštedom budžetskih sredstava.

- **Javne nabavke**

U roku koji je predviđen Programom rada Centra za 2011. godinu, sačinjen je godišnji Plan nabavki po vrsti, obimu i dinamici, a na osnovu podnesenog Zahtjeva za dodjelu sredstava iz budžeta za 2011. godinu, obzirom da Zakon o budžetu za 2011. godinu nije usvojen. Postupci javnih nabavki provedeni su u skladu sa Zakonom i Planom nabavki, a hronološki prikaz nabavki izvršenih postupkom javnih nabavki je sledeći:

Datum	Vrsta postupka	Naziv nabavka	Ugovor dodijeljen	Vrijednost ugovora u KM
Mart	Konkurentski zahtjev	Osiguranje službenih vozila	“Euroherc osiguranje” d.d. Mostar	3.467,91
Mart	Direktni sporazum	Antivirus	“Vizard Kompjuters” d.o.o. Mostar	1.137,24
Mart	Direktni sporazum	Avio karte i hotelski smještaj	“Komoder” d.o.o. Mostar	2.162,50
Juni	Konkurentski zahtjev sa objavom	Kancelarijski materijal	“Antonio komerc” d.o.o. Mostar	4.613,12
Juni	Konkurentski zahtjev sa objavom	Kompjuterski, ostali potrošni materijal i sitni inventar	“Inter-Kom” d.o.o. Zenica	8.685,20
Juni	Konkurentski zahtjev sa objavom	Gorivo	“Petrol BH Oil Kompani” d.o.o.	13.320,00
Septembar	Direktni sporazum	Usluge hrana i piće za potrebe Prve regionalne Konferencije	Hotel “ERO” d.o.o. Mostar	4.016,77
Oktobar	Direktni sporazum	Usluge obuke iz engleskog jezika	“PLC-BH” d.o.o. Mostar	3.598,73
Decembar	Konkurentski zahtjev	Promotivni materijal i poslovni pokloni	ZTR Štamparija "Badizajn" Nevesinje	3.636,12

Nakon okončanih nabavki, putem aplikacije “Wisppa” redovno su dostavljani izvještaji Agenciji za javne nabavke BiH o dodijeljenim ugovorima u postupku javnih nabavki u svakom pojedinačnom slučaju. U okviru postupaka javnih nabavki u CIP-u, izrađivani su posebni ugovori o kupoprodaji roba, te redovno dostavljani dopisi Pravobranilaštvu Bosne i Hercegovine i od njega tražena mišljenja na prethodno sačinjene nacрте ugovora.

- **Obuka državnih službenika**

Centar je kontinuirano preduzimaо mjere na realizaciji Programa obuke, kako novozaposlenih, tako i svih ostalih državnih službenika u Centru. U tom smislu, sačinjen je Plan obuke državnih službenika za 2011. godinu.

Agenciji za državnu službu Bosne i Hercegovine, upućeno je više dopisa u kojima je ukazivano na potrebu organizovanja obuka za državne službenike, te posebno na potrebu organizovanja kurseva stranih jezika i drugih vidova obuka u Mostaru.

U januaru 2011. godine jedan državni službenik učestvovao je na obuci "Evropski socijalni fond ESF – Iskustva Španije", a direktor Centra na obuci pod nazivom "Programi zajednice EU 2007.-2013." u organizaciji Direkcije za evropske integracije. Takođe, u organizaciji Direkcije za evropske integracije, u februaru su dva državna službenika učestvovali na obuci "Uvod u zakonodavstvo EU".

U mjesecu maju 2011. godine, šest državnih službenika u organizaciji Agencije za državnu službu pohađali su menadžerske obuke (interpersonalne vještine, razvijanje samosvijesti,

pisana i usmena prezentacija, menadžment vremena, stres menadžment, menadžment ljudskih potencijala, tim i timski rad) dok je jedan državni službenik pohađao uvodni seminar iz usmenog prevođenja, te kurs francuskog jezika - A2.

U mjesecu septembru 2011. godine dva državna službenika učestvovali su na obuci "Obuka o upravljanju učinkom u institucijama Bosne i Hercegovine", dok je jedan državni službenik u mjesecu oktobru pohađao obuku za trenera upravljanja učinkom u institucijama Bosne i Hercegovine.

U novembru 2011. godine organizovana je obuka iz engleskog jezika u trajanju od 72 sata koja uključuje dva pristupa: individualni i grupni. U ove vidove obuke uključeno je ukupno 6 državnih službenika i 3 zaposlenika.

U decembru mjesecu na menadžerske obuke i obuke iz oblasti prava u organizaciji Agencije za državnu službu uključeno je 7 državnih službenika, a na obuku iz javnih nabavki u organizaciji Agencije za javne nabavke 1 državni službenik.

U toku 2011. godine uspješno je završena četveromjesečna on-line obuka o priznavanju inostranih kvalifikacija koju je proveo holandski ENIC centar uz podršku Evropske komisije u okviru "Socrates" programa.

- **Kancelarijsko i arhivsko poslovanje**

U toku 2011. godine, Centar je kroz djelovodni protokol zaprimio ukupno 972 službena akata, 292 računa (Knjiga primljenih računa) i 11 akata koji se odnose na nadležnost Upravnog odbora Centra.

Rješenjem direktora Centra određeno je lice odgovorno za vođenje ukancelarijskog poslovanja. Pored toga, donesena su rješenja o određivanju organizacionih jedinica kojima se pošta dostavlja u rad, njihovih brojevanih oznaka, načinu vođenja interne dostavne knjige, kao i rješenje o formiranju komisije za vršenje nadzora nad kancelarijskom poslovanjem.

U aprili mjesecu 2011. godine, dostavljeni su izvodi iz arhivske knjige Centra (kopija arhivske knjige), dostavljeni su Arhivu Bosne i Hercegovine. U arhivsku knjigu Centra upisano je potrebno registraturno gradivo, isto je razlučeno po godinama, klasifikacijskim oznakama, vrsti i količini, dok su na registraturnim jedinicama ispisani brojevi iz arhivske knjige Centra.

U primjeni Liste kategorija registraturne građe s rokovima čuvanja ukazala se potreba za dogradnjom postojeće Liste sa novim kategorijama registraturne građe. Zbog toga se pristupilo izmjenama i dopunama postojeće Liste kategorija, te je u mjesecu oktobru 2011. godine sačinjen prijedlog Liste i isti je dostavljen Arhivu Bosne i Hercegovine radi davanja saglasnosti.

Nije bilo slučajeva gubljenja ili nestanka akta iz djelokruga rada Centra.

- **Saradnja sa nadležnim ministarstvima i drugim institucijama**

U izvještajnom periodu, pored neposredne i stalne saradnje sa ENIC centrima u Evropi i regionu, ostvarena je odgovarajuća saradnja sa Ministarstvom civilnih poslova Bosne i Hercegovine, entitetskim i kantonalnim ministarstvima obrazovanja, Odjeljenjem za obrazovanje Brčko distrikta BiH, Komisijom za informisanje i priznavanje pri Ministarstvu prosvjete i kulture Republike Srpske, Agencijom za razvoj visokog obrazovanja i obezbjeđivanje kvaliteta, Rektorskom konferencijom, kao i sa univerzitetima i fakultetima na teritoriji Bosne i Hercegovine.

U februaru 2011. godine Agenciji za državnu službu dostavljen je Plan rada Jedinice za implementaciju Zakona o držanoj službi u institucijama Bosne i Hercegovine, kao i Izvještaj o

radu Jedinice za implementaciju Zakona o držanoj službi u institucijama Bosne i Hercegovine u smislu održavanja obuka, ali u smislu provođenja Zakona o državnoj službi sa ovom institucijom održavana je kontinuirana suradnja.

- **Zaključak**

Program rada Centra za 2011. godinu razmatrao je Upravni odbor Centra na 9. sjednici održanoj 19. januara 2011. godine. Savjet ministara Bosne i Hercegovine usvojio je Programa rada Centra na 149. sjednici održanoj 27. aprila 2011. godine.

I pored činjenice da nije usvojen Budžet institucija Bosne i Hercegovine i međunarodnih obaveza Bosne i Hercegovine, Centar je uglavnom izvršio sve planirane poslove i zadatke koji su bili predviđeni Programom rada Centra za 2011. godinu.

Zbog racionalnog trošenja budžetskih sredstava odgođene su dvije planirane aktivnosti, i to:

1. Organizacija Okruglog stola o praktičnoj primjeni Lisabonske konvencije i Preporuka...Centra (učestvuju predstavnici kantonalnih ministarstva obrazovanja, Ministarstva prosvjete i kulture RS, Odjeljenja Brčko distrikta BiH i akreditovanih javnih i privatnih univerziteta u BiH) **2.** Posjeta ENIC centru Republike Crne Gore.

Iz objektivnih razloga nisu realizovani poslovi i zadaci koji se odnose na prijem državnih službenika, zaposlenika, volontera i pripravnika, jer nije vršeno zapošljavanje novih lica, zbog privremenog finansiranja institucija Bosne i Hercegovine.

Programom rada Centra za 2011. godinu, bilo je predviđeno donošenje Pravilnika o reprezentaciji i poklonima, te Pravilnika o načinu odobravanja službenih putovanja, pod uslovom da Savjet ministara Bosne i Hercegovine ova pitanja ne uredi svojim propisima. Imajući u vidu da je Savjet ministara Bosne i Hercegovine pokrenuo postupak donošenja ovih propisa, što znači da će predmetna materija biti regulisana na jedinstven način za sve institucije BiH, procedura donošenja ovih akata u Centru je obustavljena.

Broj: 02-07-1- 968 /11

Mostar, 28. decembar 2011. godine